



Sud Bosne i Hercegovine
Суд Босне и Херцеговине

Broj: S1 3 Iž 038048 20 Iž
Sarajevo, 23.10.2020.godine

Sud Bosne i Hercegovine, u drugostepenom vijeću sastavljenom od sudija Srete Crnjak kao predsjednika vijeća, Dinke Bešlagić-Čovrk i Vesne Trifunović kao članova vijeća, odlučujući o žalbi Kovačević Josipa, Dr. Franje Tuđmana 22, 23211 Vrana, Pakoštane, R. Hrvatska, izjavljenoj protiv Odluke CIK BiH broj 05-1-07-1-998/20 od 01.10.2020. godine, u nejavnoj sjednici, održanoj dana 23.10.2020. godine, donio je

R J E Š E N J E

Žalba se odbija

O b r a z l o Ź e n j e

Odlukom Centralne izborne komisije Bosne i Hercegovine broj 05-1-07-1-998/20 od 01.10.2020. godine odbijen je upis u izvod iz Centralnog biračkog spiska za glasanje izvan BiH, za Lokalne izbore 2020. godine. Sastavni dio odluke je tabela sa imenima odbijenih birača za upis u izvod.

S obzirom da nije prihvaćena prijava za upis u izvod iz Centralnog biračkog spiska za glasanje izvan BiH, Josić Blaženo je uložio žalbu navodeći da treba da se prihvati njegova prijava za glasanje izvan BiH, jer je sa još tri člana njegove obitelji prijavljen.

Centralna izborna komisija Bosne i Hercegovine dostavila je ovom sudu odgovor na žalbu u kojem je predložila da se izjavljena žalba odbije kao neosnovana jer je osporavano rješenje opravdano donešeno kako bi spriječilo negativne posljedice koje bi eventualno nastupile dostavljanem glasačkog materijala za više lica na istu adresu. Odredbe člana 5.21 stav (1) Izbornog zakona BiH propisale su da Centralna izborna komisija utvrđuje način i proceduru glasanja građana BiH poštom pa je preispitujući žaliteljevu prijavu utvrdila da je prijava poslata sa označenom adresom stanovanja izvan BiH za žalitelja i još 5 lica ukazuje da označena adresa za dostavu glasačkog materijala ukazuje na mogućnost zloupotrebe biračkog prava i da se radi o izbornom inženjeringu koji može uticati na izborni rezultat.

Ispitujući ožalbenu odluku u okviru žalbenih navoda vijeće je zaključilo da je žalba neosnovana.

Prilikom utvrđivanja činjeničnog stanja CIK BiH je, prema stanju u spisu, pravilno utvrdila da je označena adresa za prijem glasačkog materijala i elektronska adresa na prijavi, kako za žalioca tako i za još 5 lica je sa istom biračkom opcijom za sve prijave. CIK BiH je, prema stanju u spisu na osnovu potpuno i pravilno utvrđenog činjeničnog stanja izveo i pravilan zaključak, da bi dostavom osjetljivog izbornog materijala na istu adresu: adresu u Hrvatskoj, Dr. Franje Tuđmana 22, 23211 Vrana, Pakoštane, R. Hrvatska, povrijedilo osnovno izborna načelo, tajnost glasanja i izbora direktno od strane birača, koje garantuje odredba člana 1.3 Izbornog zakona BiH, te da izborna manipulacija može za posljedicu imati planirani izborni rezultat.

Naime, dostavljanje glasačkog materijala za glasanje izvan BiH sa oznakom iste adrese stanovanja izvan BiH za više od 5 lica ukazuje na mogućnost organizovanog djelovanja pojedinca ili grupe na zloupotrebi biračkog prava. Osim toga, žalitelju pobijanom odlukom nije oduzeto biračko pravo za Lokalne izbore 2020. godine, nego samo mogućnost da glasa putem pošte izvan BiH na ovim izborima, ali će moći da glasa na redovnom biračkom mjestu u opštini u kojoj ima prijavljeno prebivalište u BiH.

S obzirom na navedeno, po ocjeni ovog vijeća, pobijana odluka Centralne izborne komisije Bosne i Hercegovine je pravilna i zakonita a žalba neosnovana pa je istu, primjenom odredbe člana 81. stav 1. Zakona o upravnim sporovima Bosne i Hercegovine (Sl. glasnik BiH br. 19/02 do 74/10) valjalo odbiti.

**PREDSJEDNIK VIJEĆA
SUDIJA
Sreto Crnjak**